

Tun Hussein kisahkan 'diusir' mertua, 'diperangkap' Suhaila

SEGAMAT, Khamis — Kisah Tun Dr. Hussein Onn "dihalau" oleh bapa mertuanya dua hari sebelum hari persandingan beliau dengan Toh Puan Suhaila di sini kira-kira 33 tahun lalu menggamatkan majlis perasmian bangunan UMNO Bahagian Labis di sini petang ini.

Tun Dr. Hussein berkata, setelah berjalan begitu jauh dari Kuala Selangor (tempat beliau bertugas dalam tahun 1948) ke sini untuk melihat wajah bakal isteri, tetapi tidak dibenarkan masuk oleh Encik Noh Beirut (sekarang Tan Sri Noh).

"Saya terpaksa pergi makan di rumah rehat kerana perut terlalu lapar," kata Tun Dr. Hussein disambut dengan gelak ketawa oleh hadirin.

Bersara

Menurutnya, ini adalah di antara beberapa peristiwa manis beliau di Segamat selain dari perjuangan politik beliau menentang Malayan Union tahun 1946.

Menjawab usikan Timbalan Perdana Menteri, Datuk Musa Hitam mengenai seorang lagi cahaya mata untuk Tun Dr. Hussein sebagai menghidupkan kenangan manis beliau di sini,

beliau berkata: "Saya sudah bersara dan dalam peringkat umur saya ini niat itu ada tetapi tenaga kurang." disambut dengan gelak ketawa.

Tun Dr. Hussein menceritakan, beliau mula berkenalan dengan Toh Puan Suhaila dalam satu persembahan sandiwara mengutip derma untuk tabung UMNO di Batu Pahat 33 tahun lalu.

Menurutnya, beliau "diperangkap" oleh Toh Puan Suhaila dan waktu itu beliau baru berusia 25 tahun dan masih belum bersedia untuk berkahwin.

Menyerah

"Tetapi apa nak buat saya terpaksa menyerah kalah dengan kejelitannya dan kemudian kami bertunang dalam tahun 1946 di Segamat," katanya sambil Toh Puan Suhaila tersipu-sipu malu.

Terdahulu dari itu, Datuk Musa Hitam berkata, beliau memilih orang yang paling sesuai untuk merasmikan bangunan UMNO bahagiannya dan orang itu ialah Tun Dr. Hussein Onn.

Menurutnya, waktu tiba di sini, Tun Dr. Hussein dan Toh Puan Suhaila begitu terpesona melihat rumah di mana mereka bersanding kira-kira 33 tahun lalu.

Terdahulu dari itu, Tun Dr. Hussein dan Toh Puan Suhaila diberi sambutan secara tradisi.